

PŪ TAUTURU I TE VAA MATAÈINAA

Ia faahitihia te parau no te *turu utaa*, e *turu hōpoiā* ia te *auraa*. Tei hea atu ra ia te parau no te taata. Te hōpoiā anei te mea e *turu*, aore ra te taata te tauturu ia roaa ia na iho i niā i to na tiāraa taata ia rave i ta na hōpoiā. E aha te mea e itehia nei. Teie, e moni haamauuruu te hōroāhia na na ia rahi roa ta na tamarii e ia òre ia roaa faahou ia na i te faatere. Te reira anei te tauturu. E aha iho ra te hōpeāraa o te reira mau tamarii.

Na hea ia tātou ia parau i teie mea i parauhia na e : Afata moni tamarii, e parau paha : e "Pū tauturu i te vaa mataèinaa". Ia pāpū rā i te manà e, tei te taata tātai tahi te amo i ta na hōpoiā.

Te parauhia nei te *turu utaa* i te mau taime atoā no te mau huru òhipa atoā. Mea tano paha ia faataa i te tahi mau tuhaa.

Te utuafare fifi

Te vai nei te tahi mau utuafare i roto i te fifi aore ra te mau tamarii. Aita e òhipa ta te metua, aore ra te metua vahine, e inu te òhipa, e ori noa te tamarii e, eia atu. E parau i te reira e utuafare fifi aore ra e tamarii fifi. I teie nei tātou e ite ai e teie pū e parauhia nei e *turu utaa* eita o na e amo i te hōpoiā (te utaa) a na metua.

Te purutaa

Eiaha tātou e hitimahuta e parau tumu teie na tātou. Teie te *auraa* : tauturu, faaora i te tahi taata i roto i te fifi. Te ioa teie e tano no te tahi mau taata



e parauhia nei e "assistante sociale". Na rātou e titororo e tuatāpapa ia itehia te mau utuafare o te vaa mataèinaa i roto i te fifi. Eere rātou i te mau vahine *turu utaa*, no te mea eere na rātou e amo i te hōpoiā a te taata. Ta rātou, te faaite-noa-raa i te utuafare fifi i te huru tauturu e vai ra ei faaohieraa i te mau aniraa ia roaa mai taua tauturu ra.

Te iōa

E mea faufaa roa te iōa e hōroāhia no te tahi òhipa no te mea e faahuru e o na i te huru o te taata, mai te peu te taa ra te taata i te *auraa* o teie parau : *turu utaa*, e o mai te manà e, te vai ra te hoē pū haamauhia no te amo i ta na hōpoiā. E manà hape rā te reira.

Ia parau ra tātou e, e pū tauturu i te vaa mataèinaa, aita ia te taata e haavarehia ra e, e amohia ta na hōpoiā. E taata paari ra o ia i reira, ia taa maitai ia na e e tauturu tei faataahia, te mea rā tei faateimaha e i haafifi i to na oraraa, na na te reira e tātara. Aita rā e tauturu

maitai mai te peu aita e haapiiraa i te taata e, to na ora tei roto i to na rima, vai noa atu ai te tauturu, e parau taa e ia. Ia haamau te tiaturiraa i niā i teie parau *turu utaa*, a àanei tātou e riro ai ei nūnaa tāparu i te tiāi-noaraa ia haerehia mai ta na utaa, ta na hōpoiā e amohia e te tahi mau taata e atu.

Aita e tauturu maitai, maoti te iteraa òe i te faatere ia òe iho, òre noa atu ai òe e riro ei taata ravaì, e taata tiāmā rā òe.

No reira atire tātou i te tiaturi e, e turuhia ta tātou utaa, ta tātou hōpoiā. Te vai ra te mau tauturu huru rau i faataahia e parau mau, ta òe rā utaa, ta òe hōpoiā na òe iho te reira.

Te vaa mataèinaa

Hoē a o tātou fauraò, ia fifi te tahi pae, tātou atoā ia hepohepo no rātou. Eita ia tātou e faaea noa i roto i te tauà òre, e faahapahapa.

E vaiho rā vau na tātou tātai tahi e feruri maitai i te *auraa* hōhonu o teie parau. Tirā rā.

Turo a Raapoto.

